

---

Title	Tentang: Kekata baku/piawai (2)
Author(s)	Muhammad Ariff bin Ahmad

---

Copyright © 1992 Muhammad Ariff bin Ahmad

Haji Muhammad Ariff Ahmad  
SB1 67 0912 1147  
Sari Bahasa SBC W2 92027  
Jul 27 1992  
tentang: kekata baku / piawai (2)

Terdahulu daripada ini, telah kita cakapkan tentang kekata baku yang bermakna *standard*, misalnya bahasa baku, sebutan baku, ejaan baku dan lain-lain. Demikian pula dengan kata piawai yang juga bermakna *standard* pada mutu, terutama mutu barangan.

Adapun makna lain kekata baku ialah yang *pokok* atau yang *asal*; yang *utama*; yang *ditentukan* misalnya yang terpalai dalam wacana seperti:

- (1) Makanan baku bagi orang Melayu ialah nasi.
- (2) Barang itu dijual dengan harga baku.

Demikian pula dengan kekata piawai. Dalam bahasa Minangkabau, piawai itu bermakna *cekap*, *pandai* atau *pintar*, misalnya yang terpakai dalam wacana seperti:

- (3) Seorang ahli nujum yang piawai telah meramalkan bahawa pulau itu akan karam tidak berapa lama lagi.
- (4) Kejadian yang demikian genting itu hanya akan dapat ditangani ekonomis yang bijaksana lagi piawai.

Selain daripada itu, piawai bermakna juga *betul*, *tepat* atau *persis*, misalnya yang terpakai dalam wacana seperti:

- (5) Anak dacing itu tidak piawai dengan timbangannya.
- (6) Bungkal yang piawai ialah anak dacing yang sah.

'Anak dacing' ialah batu imbang yang digunakan sebagai penentu yang tepat bagi timbangan yang menggunakan sistem timbang kati dan tahlil. Sekarang orang menimbang dengan kiraan kilogram, maka 'anak dacing' itu tidak kelihatan lagi. satu kati bersamaan dengan 16 tahlil iaitu kira-kira 550 gram.

'Bungkal' ialah timbangan bagi emas atau perak. satu bungkal bersamaan dengan 16 mayam atau 192 saga atau 384 kundi. Sekarang orang menimbang emas dengan kiraan 'troy ounces'. MUIS menetapkan minimum simpanan wang yang dikenakan zakat ialah berdasarkan harga emas seberat 20 misqal, iaitu kira-kira 86 gram atau 2.7895 troy ounces.

sekian dahulu.